

## 卷第四百十三 草木八

芝（菌蕈附） 竹芝 樓闕芝 天尊芝 紫芝 參成芝 夜光芝 隱晨芝 鳳腦芝

白符芝 五德芝 石桂芝 滴芝 木芝 螢火芝 肉芝 小人芝 地下肉芝

異菌 石菌 竹肉 毒菌

苔 敘苔 地錢 蔓金苔 如苕苔 石發 瓦鬆 瓦鬆賦

芝（菌蕈附）

竹芝

梁簡文延香閣，大同十年，竹林吐芝。長八寸，頭蓋似雞頭實，黑色。其柄似藕柄，內通乾空。皮質皆純白，根下微紅。雞頭實處似竹節，脫之又得脫也。自節處別生一重，如結網羅，四面，周可五六寸，圓繞周匝，以單柄上。相遠不相著也。其似結網眾自（校者按，「眾自」當為「眾目」），輕巧可愛。其與柄皆得相脫。驗仙書，與威喜芝相類。（出《西陽雜俎》）

樓闕芝

隋大業中，東都永康門內會昌門東，生芝草百二十莖，散在地，周十步許。紫莖白頭，或白莖黑頭。或有枝，或無枝。亦有三枝，如古「出」字者。地內根並如線，大道相連著。乾陽殿東，東上閣門槐樹上，生芝九莖，共本相扶而生。中莖最長，兩邊八莖，相次而短，有如樹闕。甚潔白。武賁郎將段文操留守，圖畫表奏。（出《大業拾遺記》）

天尊芝

唐天寶初，臨川郡人李嘉，所居柱上生芝草，形類天尊。太守張景佚截獻之。（出《西陽雜俎》）

紫芝

唐大曆八年，廬州廬江縣紫芝生，高一丈五尺，芝類至多。（出《西陽雜俎》）

參成芝

參成芝，斷而可續。（出《西陽雜俎》）

夜光芝

夜光芝，一株九實。實墜地如七寸鏡。夜視如牛目。茅君種於句曲山。（出《西陽雜俎》）

隱晨芝

隱晨，狀如斗，以星為節，以莖為網。（出《西陽雜俎》）

鳳腦芝

《仙經》言，穿地六尺，以環寶一枚種之，灌以黃水五合，以土堅築之。三年，生苗如匏，實如桃，五色。名鳳腦芝。食其實，唾地為鳳，乘升太極。（出《西陽雜俎》）

白符芝

白符芝，大雪而白華。（出《西陽雜俎》）

五德芝

五德芝，如車馬。（出《西陽雜俎》）

石桂芝

石桂芝，生山石穴中，似桂樹而實石也。高如大絞尺，光明而味辛，有枝條。搗服之，一斤得千歲也。（出《西陽雜俎》）

滴芝

少室石戶中，更有深谷，不可得過。以石投谷中，半日猶聞其聲也。去戶外十餘丈，有石柱，柱上有偃蓋石，南度徑可一丈許。望之，蜜芝從石上隨石偃蓋中，良久，輒有一滴，有似雨屋後之餘漏，時時一落耳。然蜜芝墮不息，而偃蓋亦終滴也。戶上刻石為科門字，曰：「得服石蜜芝一斗者，壽萬歲。」諸道士共思惟其處，不可得往。唯當以碗器置勁竹木端，以承取之。然竟未有能為之者。按此戶上刻題如此，前世必已有之者也。（出《抱樸子》）

木芝

木芝者，松柏脂淪地千歲，化為茯苓；萬歲，其上生小木，狀似蓮花，名曰木威喜芝。夜視有光，持之甚滑。燒之不焦。帶之辟兵。以帶雞，而雞以雞十二頭籠之，去其處十二步，射十二箭，他雞皆傷，帶威喜芝者，終不傷也。（出《抱樸子》）

螢火芝

良常山有螢火芝，其實是草，大如豆。紫花，夜視有光。食一枚，中心一孔明。食至七，心七竅洞澈。可以夜書。（出《西陽雜俎》）

肉芝

昔有人泊渚登岸，忽見蘆葦間，有十餘崑崙偃臥，手足皆動。驚報舟人。舟人有嘗行海中者識之，菌也。往視之，首皆連地。割取食之，菌但無七竅。《抱樸子》云：「肉芝如人形，產於地。」亦此類也。何足怪哉？（出《嶺南異物志》）

小人芝

或山中見小人，乘車馬，長七八寸者，肉芝也。取服芝，即仙矣。（出《抱樸子》）

地下肉芝

蘭陵蕭逸人，亡其名。嘗舉進士下第，遂焚其書，隱居潭水上，從道士學神仙。因絕粒吸氣，每日屈伸支體，冀延其壽。積十年餘，發盡白，色枯而背偻，齒有墮者。一旦引鏡自視，勃然發怒，且曰：「吾棄聲利，隱身田野間，絕粒吸氣，冀得長生。今亦衰癯如是，豈我之心哉？」即還居鄴下，學商人逐什一之利。凡數年，資用大饒，為富家。後因治園屋，築地得物，其類人形，皆上

潤，色微紅。逸人得之驚曰：「豈非禍之芽？且吾聞太歲所在，不可興土事。脫有犯者，當有修肉出其下，固不祥也。今果有，奈何？然吾聞：得肉食之，或可以免。」於是烹而食，味甚美，食且盡。自是逸人聽視明，力愈壯，貌愈少。發之禿者，盡黧然而長矣；齒之墮者，亦駢然而生矣。逸人默自奇異，不敢告於人。後有道士至鄴下，逢逸人。驚曰：「先生嘗得餌仙藥乎？何神氣清晤如是？」道士因診其脈。久之又曰：「先生嗜食靈芝矣。夫靈芝狀類人手，肥而且潤，色微紅者是也。」逸人悟其事，以告。道士賀曰：「先生之壽，可與龜鶴齊矣。然不宜居塵俗間，當退休山林，棄人事，神仙可致。」逸人喜而從其語，遂去。竟不知所在。（出《宣室志》）

#### 異菌

唐開成元年春，段成式修行裡思第書齋前，有枯紫荊數株蠹折，因伐之，餘尺許。至三年秋，枯根上生一菌，大如斗，下布五足，頂黃白兩暈，綠垂裙，如鵝鞞，高尺餘。至冬（「冬」原作「午」，據陳校本改），色變黑而死。焚之，氣如茅香。成式嘗置香炉於枱台上唸經，問僧。以為善徵。後覽諸志怪：南齊吳郡褚思莊，素奉釋氏。眠於梁下，短柱是枱木，去地四尺餘，有節。大明中，忽有一物如芝，生於節上，黃色鮮明，漸漸長。數日，遂成千佛狀。面目指爪及光相衣服，莫不宛具，如金鑲隱起（「隱起」原作「起隱」，據陳校本改），摩之殊軟。嘗以春末落，落時佛形如故，但色褐耳。至落時，其家貯之箱中。積五年，思莊不復住其下，亦無他顯盛。闔門壽老：思莊父終九十七；兄年七十，健如壯年。（出《西陽雜俎》）

#### 石菌

宋州莆田縣破崗山，唐武宗二年，巨石上生菌，大如合簣，莖及蓋黃白色。其下淺紅。盡為過僧所食。云：美倍諸菌。（出《西陽雜俎》）

#### 竹肉

竹肉。江淮有竹肉，如彈丸，味如白雞（「雞下」原有「竹皆」二字，據明抄本、陳校本刪）。代（「代」原作「向」，據明抄本、陳校本改）北又有大樹雞，如杯棬。呼為胡獮頭。廬山有石耳，性熱。（出《西陽雜俎》）

#### 毒菌

江夏漢陽縣出毒菌，號茹閻。非茅搜也。每歲供進。縣司常令人於田野間候之，苟有此菌，即立表示人，不敢從下風而過，避其氣也。彩之日，以竹竿芟倒，遽舍竿於地，毒氣入竹。一時爆裂。直候毒歇，仍以櫟柳皮蒙手以取，用氈包之，亦櫟柳皮重裹。縣宰封印在而進。其齎致役夫，倍給其直，為其道路多為毒薰，以致頭痛也。張康隨侍其父宰漢陽，備言之。人有為野菌所毒而笑者，煎魚樾汁服之，即愈。僧光遠說也。（出《北夢瑣言》）

#### 苔紋

#### 苔

苔錢亦謂之澤葵，又名董錢草，亦呼為宣癩，南人呼為垢草。（出《述異記》）

#### 地錢

地錢，葉圓莖細，有蔓，多生谿澗邊。一曰積雪草，亦曰連錢草。（出《西陽雜俎》）

#### 蔓金苔

晉梨國獻蔓金苔。色如金，若螢火之聚，大如雞卵。投之水中，蔓延波瀾之上，光出照日，皆如火生水上也。乃於宮中穿池，廣百步，時時觀此苔，以樂宮人。宮人有幸者，則以金苔賜之。以置漆碗中，照耀滿室，名曰夜明苔。著衣襟則如火光矣。帝慮外人得之，炫惑百姓，詔使除苔塞池。及皇家喪亂，猶有此物。皆入胡中。（出王子年《拾遺記》）

#### 如苕苔

慈恩寺唐三藏院後簷楷，開成末，有苔狀如古苕，布於磚上，色如藍綠，輕軟可愛。談論僧義林，大和初，改葬基法師，初開塚，香氣襲人。側臥磚台上，形如生。磚上苔厚二寸餘，作金色，氣如蕪檀。（出《西陽雜俎》）

#### 石發

張乘言，南中水底有草，如石發。每月三四日始生，至八九已後可採。及月盡，悉爛。似隨月盛衰也。（出《西陽雜俎》）

#### 瓦鬆

《廣雅》：「在屋曰昔耶，在牆曰垣衣。」《廣志》謂之蘭香。生於久屋之瓦。魏明帝好之，命長安西載其瓦（「魏明帝」等十二字原缺，據《西陽雜俎》十九補）於洛（「洛」原作「落」，據《西陽雜俎》十九改）陽，以覆屋。前後詞人詩中，多用「昔耶」。梁簡文帝《詠薇》曰：「緣階覆碧綺，依簷映昔耶。」或言構木上多鬆栽，土木氣泄，則瓦生鬆。大歷中，修含元殿，有一人投狀請瓦，且言瓦工唯我所能。祖父時嘗瓦此殿矣，眾工不能服。因曰：「若有能瓦畢不生瓦鬆乎？」眾方服焉。又有李阿黑者，亦能治（「治」原作「至」，據《西陽雜俎》十九改）屋，布瓦如齒，間不通縫，亦無瓦鬆。《本草》：「瓦衣謂之屋游。」（出《西陽雜俎》）

#### 瓦鬆賦

崔融《瓦鬆賦·序》云：「崇文館瓦鬆者，產於屋溜之下。謂之木也，訪山客而未詳；謂之草也，驗農皇而罕記。」賦云：「煌煌特秀，狀金芝之產溜。歷歷虛懸，若星榆之種天。葩條鬱毓，根祗連拳。間紫苔而裊露，凌碧瓦而含煙。」又曰：「慚魏宮之烏悲，惡漢殿之紅蓮。」崔公學博，無不該悉，豈不知瓦鬆已有著說乎？（出《西陽雜俎》）